

# La PSR extenda ses radius d'acziun

Promover projects e dar sustegn

■ (anr/gc) **La Pro Svizra Rumantscha (PSR) è vegnida fundada 1992. L'iniziativa persuerter è stada a ses temp la prestaziun zunt meritaivla da l'alur fitg activa Lia Rumantscha. La PSR è schizunt vegnida presidiada l'emprim da ses anteriur parsura Toni Cantieni.** La finamira era da realisar ina gasetta rumantscha dal di – da lez temp be pussaivel sut fitg grevas cundiziuns e circumstanzas. Tuttina revegan euforia e speranza, siond che la PSR aveva pudì rimnar en curt temp datiers da 600 commembers. Quels han procurà per in solid fundament finanziàl. Oz munta la facultad da la PSR a passa 50 000 francs ed il gudogn per l'onn passà è inditgà cun prest

4000 francs. Da preschent ha la PSR enturn 300 commembers

## L'acziun principala d'ussa – il champ da stad

La PSR ha sustegnì – suenter la realisaziun da La Quotidiana 1997 – onns ora curs da scolaziun e seminaris da perfecziun per schurnalists e schurnalistas rumantschs. Dapi intgins onns ha la PSR fixà sco finamira da stgaffir punts tranter la Rumantschia – tant anen- sco anovers. Sco term fix organischescha ella dapi onns in champ da vacanzas da stad. Avant insaquants onns tals da teater per uffants ed ils davos onns mingamai da quels per «chavar aur e cristals» a Sedrun. 2014 èn 30 uffants or da tuttas re-

giuns linguisticas rumantschas e si da la Bassa sa participads. Sut l'egida da *Prisca Berther* e *Sandro Cavegn* è quel champ stà in success. A tal ha er il musicist indigen, *Pascal Gamboni*, contribuì. Finanziàlmain è il curs – che ha custà ca. 21 000 francs – vegnì sustegnì fermamain da sponsurs. Er ils participants han contribuì uschia ch'igl è anc restà a la PSR da dar 1500 francs.

Quest onn ha il champ da vacanzas da stad – era per «chavar aur e cristals» – lieu dals 19 fin 24 da fanadur a Sedrun cun ils medems cooperaturs sco ils onns passads.

## La radunanza a Cuira

La PSR ha salvà uonn sia radunanza venderdi e Cuira sut il presdi da *Cata-*

*rina Morscher*, Sur. La PSR è fitg engraziavla a cuss. guv. *Jon Domenic Parolini* che ha represchentà blers onns la PSR en il Cussegl da fundaziun da l'Agentura da novitads rumantscha (anr) ch'el ha era presidià. Er è ella fitg cuntenta che cuss. naz. *Martin Candinas* è daventa ses successur sco commember en il cussegl.

## Program 2015

Ultra dal champ da stad stattan era la modernisaziun da la pagina d'internet da la PSR e la creaziun d'in nov logo per quella sin il program da l'onn. Vitiers vegn il postulat per barats da scolas tranter las diversas regiuns rumantschas. Tals

na pon dentant betg vegnir realisads per quest onn. Plinavant ha la PSR decidì – sin proposta – da contrahar cun il schef-redactur da La Quotidiana, *Martin Cabalzar*, per intervegnir co la PSR pudeschia contribuir finanziàlmain ad ina acziun da propaganda per recaltgar novs abbonents.

## Tschernas

*Uorschla Natalia Caprez*, Cuira, ha demissionà sco suprastanta da la PSR. En ses stagl è la filologa *Annetta Zini*, Strada/Engiadina, vegnida tschernida. – Retroactivamain han ins elegì *Nicolina Cathomen*, Sedrun, e *Beat Hosang*, Mustér, per la revisiun dals quintes.